



Adresa: **Ul. Hamdije Čemerlića 39a**
71000 Sarajevo
<http://www.voda.ba>

tel. +387 33 726 422
fax. +387 33 726 423
e – mail: info@voda.ba

Broj: **UP-1/21-3-40-182-4/26**
Datum: **21.05.2026. godine**

„Agencija za vodno područje rijeke Save“ Sarajevo rješavajući po zahtjevu korisnika JKP „Komunalac“ d.o.o. Hadžići, za izdavanje vodne dozvole za zahvat vode sa izvorišta „Kradenik“ u svrhu obezbjeđenja potrebnih količina vode za piće stanovništva i privrede koje se vodom snabdijeva putem javnog vodovodnog sistema, na području naselja Pazarić, općina Hadžići, na osnovu člana 139. stav (1) tačka 1. Zakona o vodama („Službene novine Federacije BiH“, broj 70/06) i člana 200. stav (1) Zakona o upravnom postupku („Službene novine Federacije BiH“, broj 2/98, 48/99 i 61/22), donosi

RJEŠENJE **o vodnoj dozvoli**

1. Daje se vodna dozvola podnosiocu zahtjeva JKP „Komunalac“ d.o.o. Hadžići, za zahvatanje vode sa izvorišta „Kradenik“ u količini od cca $Q=16,0$ l/s, a u svrhu obezbjeđenja potrebnih količina vode za piće stanovništva i privrede koje se vodom snabdijeva putem javnog vodovodnog sistema, na području naselja Pazarić, općina Hadžići.
2. Vodna dozvola se daje na osnovu dostavljene dokumentacije, izvršenog uviđaja na objektima, utvrđenog činjeničnog stanja i uz sljedeće uslove:
 - 2.1. Da korisnik predmetne vodozahvatne objekte održava u funkcionalnom stanju i koristi u skladu sa njihovom prirodom i namjenom, te u skladu sa uslovima iz ove vodne dozvole.
 - 2.2. Da korisnik vodocrpilišta u cilju kontrole, evidencije i plaćanja količina zahvaćene vode vrši mjerenje iste, a što se u ovom trenutku obezbjeđuje putem mjerača protoka-vodomjera ugrađenog na izlaznoj cijevi iz rezervoara Pazarić, tip: Insa DN 200 Qn 150 m³/h serijski broj: 69839968. Evidenciju o mjerenjima zahvaćenih količina vode vršiti u skladu sa Pravilnikom o sadržaju i načinu vođenja evidencije i dostavljanje podataka o količinama zahvaćene vode („Službene novine FBiH“ br. 83/08).
 - 2.3. Da obezbijedi tehničku ispravnost ugrađenog mjernog uređaja za evidentiranje zahvaćenih količina vode, opreme na postrojenju za kloriranje kao i na objektima transportnog sistema (pumpe, vodomjeri, zatvarači itd.), odnosno da redovno vrši baždarenje mjerača protoka u skladu sa propisima o mjernim uređajima.
 - 2.4. Da se uredno vodi dnevnik rada u koji će se unositi podaci o postupku tretmana vode i potrošnji svih hemikalija.
 - 2.5. Korisnik je dužan vršiti redovnu kontrolu uskladištenih hemikalija i obezbijediti takve uslove koji će spriječiti zagađenje površinskih i podzemnih voda uskladištenim materijama, odnosno spriječiti moguće isticanje hlora i drugih komponenti iz objekta. Također je dužan obezbijediti adekvatan apsorber za prikupljanje hemikalija u slučaju incidentnog izlivanja.
 - 2.6. Da korisnik osigura stalni i sistemski pregled vode i preduzme mjere za osiguranje zdravstveno ispravne vode za piće, u skladu sa Pravilnikom o zdravstvenoj ispravnosti vode za piće („Službeni glasnik BiH“, 40/10, 43/10, 30/12 i 62/17).
 - 2.7. Da kontrolu ispitivanja kvaliteta vode za potrebe vodosnabdijevanja vodom za piće mogu vršiti ovlaštene laboratorije, u skladu sa članom 48. stav (3) Zakona o vodama.
 - 2.8. Da se, ukoliko se prilikom redovnih ili vanrednih analiza i kontrola kvaliteta vode iz ovog vodovodnog sistema utvrdi da ista ne zadovoljava uvjete vode za piće propisane Pravilnikom o zdravstvenoj ispravnosti vode za piće, vodovodni sistem treba isključiti iz upotrebe odnosno blagovremeno, na adekvatan način, obavijestiti krajnje potrošače da voda nije za piće.
 - 2.9. Da se stalno sprovode mjere o zaštiti izvorišta u skladu s Odlukom o zaštiti izvorišta vode za piće „Kradenik“ objavljena u Službenim novinama Kantona Sarajevo, broj: 27/2019.
 - 2.10. U cilju najstrože kontrole prostora na kojem su smješteni vodozahvatni objekti-kaptaže i prateći objekti potrebno je na odgovarajući način obilježiti upozorenjem o zabrani neovlaštenog pristupa. Ogradu i ograđeni prostor oko izvorišta „Kradenik“ potrebno je održavati što znači da je ovaj prostor

- potrebno kositi, uklanjati samoniklo šiblje i grmlje i isti obezbijediti i drugim mjerama fizičke zaštite i osiguranja, a što prvenstveno uključuje službu fizičkog obezbjeđenja na izvoristu (povremeni obilazak ili stalna posada), te alarm i druge mjere zaštite, ukoliko se to ocijeni potrebnim.
3. Ukoliko radom predmetnog objekta dođe do promjene režima voda, a te promjene prouzrokuju štete ma kakvog karaktera, korisnik je dužan uzroke štete otkloniti, a nastale štete nadoknaditi.
 4. Korisnik objekta treba da u cilju kontrole, evidencije i plaćanja količina zahvaćene vode vrši kontinuirano mjerenje količina zahvaćene vode i podatke o tim mjeranjima unosi u Knjigu evidencije o količinama zahvaćene vode. Korisnik objekata je obavezan vršiti plaćanje posebne vodne naknade u skladu sa članom 170. stav 1. tačka 1. alineja 1. Zakona o vodama i Pravilnikom o načinu obračunavanja, postupku i rokovima za obračunavanje i plaćanje i kontrolu izmirivanja obaveza na osnovu opšte vodne naknade i posebnih vodnih naknada („Službene novine Federacije BiH”, broj 92/07, 46/09, 79/11 i 88/12) i Odlukom o visini posebnih vodnih naknada („Službene novine Federacije BiH”, broj 46/07, 10/14 i 03/16).
 5. Prava stečena po ovoj vodnoj dozvoli ne mogu se prenositi na treća lica, a ista se mogu izmijeniti u zakonom propisanim slučajevima.
 6. Ova vodna dozvola, shodno članu 117. stav 1. Zakona o vodama („Službene novine Federacije BiH”, broj 70/06) se daje s rokom važenja od pet (5) godina od pravosnažnosti ovog rješenja.
 7. Prije isteka važnosti ove dozvole korisnik je dužan da podnese zahtjev za izdavanje nove vodne dozvole.
 8. Za izgradnju novog ili rekonstrukciju ili uklanjanje postojećeg objekta te promjenu uslova zahvatanja vode, ako bi se time uticalo na promjenu kvaliteta i kvantiteta voda, odnosno, ako se time mogu trajno, povremeno ili privremeno prouzrokovati promjene u režimu voda, korisnik predmetnog objekta je dužan pribaviti vodne akte (prethodnu vodnu saglasnost, vodnu saglasnost i vodnu dozvolu).
 9. Ovo Rješenje o vodnoj dozvoli može se izmijeniti ukoliko nastupe okolnosti iz člana 130. stav (1) Zakona o vodama.

Obrazloženje

JKP „Komunalac” d.o.o. Hadžići zahtjevom broj: 1872-II-05/26 od 28.04.2026. godine, koji je zaprimljen na protokolu Agencije od 30.04.2026. godine, obratio se Agenciji za izdavanje Rješenja o vodnoj dozvoli za zahvat vode sa izvorišta „Kradenik” u količini od cca $Q=16,0$ l/s, a u svrhu obezbjeđenja potrebnih količina vode za piće stanovništva i privrede koje se vodom snabdijeva putem javnog vodovodnog sistema, na području naselja Pazarić, općina Hadžići.

Uz zahtjev je dostavljena sljedeća dokumentacija:

- Aktuelni izvod iz sudskog registra, broj: 065-0-RegZ-26-004094 od 02.04.2026. godine, izdat od strane Općinskog suda u Sarajevu – ovjerena kopija,
- Kopija katastarskog plana, Ur. Broj: 05-26-2-5521/2026-4 od 28.04.2026. godine, izdata od strane Službe za imovinsko-pravne poslove, geodetske poslove i katastar nekretnina općine Hadžići,
- Zemljišnoknjižni izvadak, Katastarska općina Pazarić, broj: 065-0-NAR-26-030 303 Zemljišnoknjižni uložak broj: 889 izdat od strane Općinskog suda u Sarajevu – ovjerena kopija,
- Opći akt o održavanju, korištenju i promatranju vodnih objekata „Kradenik” Pazarić, broj: 1505-III-05/26 od 06.04.2026. godine urađen od strane JKP „Komunalac” d.o.o. Hadžići,
- Izvještaji o fizičko-hemijskom ispitivanju vode, broj: 17241/25 od 12.11.2025. godine, broj: 756/26 od 22.01.2026. godine urađeni od strane JU Zavod za javno zdravstvo Kantona Sarajevo – kopije,
- Izvještaj o mikrobiološkom i fizičko-hemijskom ispitivanju vode, broj: 5235/26 od 16.04.2026. godine urađen od strane JU Zavod za javno zdravstvo Kantona Sarajevo – kopija,
- Zapisnik o zamjeni i demontaži vodomjera od 03.04.2024. godine sa garantnim listom – kopije,
- Odluka o zaštiti izvorišta vode za piće „Kradenik” objavljena u Službenim novinama Kantona Sarajevo, broj: 27/2019 – kopija,
- Dokaz o uplaćenju upravnoj pristojbi za zahtjev.

Nakon izvršenog uvida u dostavljeni zahtjev i priloženu dokumentaciju utvrđeno je da su uz zahtjev dostavljeni potrebni prilozi, te je ovaj organ u skladu sa odredbama Zakona o upravnom postupku pokrenuo postupak u cilju utvrđivanja relevantnih činjenica u ovoj upravnoj stvari.

Nakon pregleda dostavljene dokumentacije, u skladu sa članom 12. stav 5. i 6. Pravilnika o sadržaju, obliku, uvjetima i načinu izdavanja i čuvanja vodnih akata („Službene novine Federacije BiH” broj 31/15,

55/19, 41/20, 63/22), izvršen je uviđaj na terenu i tom prilikom sačinjen Zapisnik broj:UP-1/21-3-40-182-2/26 od 20.05.2026. godine.

Na osnovu dostavljene dokumentacije, izvršenog uviđaja na licu mjesta utvrđeno je sljedeće:

- Snabdijevanje sanitarnom vodom korisnika naselja Pazarić (stanovništva i privrede koje se vodom snabdijeva putem javnog vodovodnog sistema), općina Hadžići vrši se putem tri odvojena sistema vezana za izvorišta Kradenik, Ramići i Brečak.
- Izvorište Kradenik nalazi se 3,8 km južno od Pazarića. Izvorište je locirano na obroncima planine Bjelašnice ispod vrha Hranisava. Površina orografskog sliva izvorišta je 0,62 km², dok je površina hidrogeološkog sliva procijenjena na 2,16 km². U sklopu izvorišta izgrađene su dvije ukopane kaptažne građevine na udaljenosti od cca 40 m na potezu istok – zapad, ispod vrha Hranisava. Kaptažne građevine su sagrađene 1974. godine, kada je pušten u eksploataciju i dovodni ACC cjevovod promjera DN 200 mm. Kapacitet izvorišta iznosi cca 25,0 l/s.
- Zapadna kaptažna građevina ograđena je žičanom ogradom (kaptaža "Kradenik 2"). Istočna kaptaža (kaptaža "Kradenik 1") nije ograđena tj. problem ove kaptažne građevine je činjenica da deminiranje terena oko građevine nije završeno tj. postoji sumnja u prisustvo NUS-a!
- Oko kaptažnih građevina ne nalaze se izgrađeni objekti niti se ne uočavaju pojave otpada ili drugih okolišnih rizika koji mogu ugroziti kvalitetu voda izvorišta „Kradenik“.
- Na osnovu neposredne prospekcije terena može se zaključiti da se radi o stabilnom terenu na lokaciji kaptažnih objekata. Kaptaže su projektovane kao armirano betonski poluukopani objekti, istih gabaritnih dimenzija 1,60x2,90 m. Visinski su postavljene tako da se uklapaju u kosinu terena ispod padine.
- Zahvaćena količina vode se transportuje do rezervoara Pazarić pomoću azbest- cementnog cjevovoda dužine 3,82 km i promjera DN 200 mm, a zatim cjevovodom istih karakteristika dužine cca 16 km distribuira do potrošača. Zapremina rezervoara iznosi V=200 m³ i u njemu se vrši dezinfekcija vode klorisanjem Na-hipohloritom. U sklopu ovog vodovodnog sistema se nalazi pet rasteretnih komora.
- Uzorkovanje voda vrela Kradenik vrši se na dotoku vode u rezervoar (sirova voda). Rezultati fizičko-kemijske analize ukazuju da su svi parametri (boja, miris, mutnoća, pH...) u dozvoljenim granicama. Mikrobiološkim analizama vode nije utvrđeno prisustvo Escherichia coli, koliformnih bakterija i živih klica u uzorcima. Dakle, uzorci vode po mjernim pokazateljima odgovaraju uslovima Pravilnika o zdravstvenoj ispravnosti vode za piće („Službeni glasnik BiH" br. 40/10; 43/10; 30/12; 62/17). Povremene analize sirove vode vrši i interna laboratorija i to fizičko-hemijske analize vode, a sve u skladu sa HACCP Codex Alimentarius od 2019. godine.
- Skladištenje klora se vrši u magacinu u posebnom spremniku 1205 kg u krugu firme i po potrebi transportuje do rezervoara. Uredno se vodi dnevnik rada u koji se unose podaci o postupku hlorinacije i potrošnji svih hemikalija.
- Procjenjuje se da se putem javnog vodosnabdijevanja pokriva potreba za pitkom vodom (sa Kradenika) za oko 2 100 stanovnika i oko 80 privrednih potrošača i ustanova. Zapremina rezervoarskog prostora dovoljna je za pokrivanje izravnog varijacija u potrošnji i obezbjeđenje sigurnosti u pogonu.
- Najizraženiji problemi koji se javljaju na sistemu su veliki gubici u mreži koja je orijentacione dužine oko 20 km i izvedena u različitim vremenskim periodima, od različitog cijevnog materijala. Individualni vodomjeri su ugrađeni.
- Podatke o zahvaćenim količinama vode „ZV" Obrasce redovno dostavljaju Agenciji. Mjerenje zahvaćenih količina vode se vrši preko mjerača protoka-vodomjera ugrađenog na izlaznoj cijevi iz rezervoara Pazarić, tip: Insa DN 200 Qn 150 m³/h serijski broj: 69839968. Mjerač protoka je ugrađen 2024. godine. Evidenciju o mjerenjima zahvaćenih količina vode vršiti u skladu sa Pravilnikom o sadržaju i načinu vođenja evidencije i dostavljanje podataka o količinama zahvaćene vode („Službene novine FBiH" br. 83/08). Ukupno zahvaćena količina vode iznosi cca 16 l/s.
- Urađen je Elaborat o zaštitnim zonama izvorišta u skladu sa odredbama Pravilnika o utvrđivanju uslova za određivanje zona sanitarne zaštite i zaštitnih mjera za izvorišta vode za javno vodosnabdijevanje stanovništva („Službene novine Federacije BiH" broj 88/12) i donesena je Odluka o zaštiti izvorišta vode za piće „Kradenik". Propisane mjere zabrane, ograničenja i dr. se na terenu provode.
- U prethodnom periodu, od izdavanja prethodnog rješenja o vodnoj dozvoli pravno lice nije vršilo doradu, dogradnju ili rekonstrukciju i sl. na kaptažnim objektima.

Na osnovu provedenog postupka, a prema članu 17. stav 1. i 2. Zakona o vodama, u svrhu ostvarivanja prava na vodu drugim korisnicima kao i održivog korištenja voda, korisniku objekata JKP „Komunalac"

d.o.o. Hadžići, ovom su vodom dozvolom, u tački 2. dispozitiva rješenja, propisani uslovi korištenja objekata. Podnosilac zahtjeva, kao korisnik objekata obavezan je pridržavati se navedenih uslova, u skladu sa članovima 48., 64., 66., i 116. Zakona o vodama i članovima 13. i 14. Pravilnika o sadržaju, obliku i uvjetima i načinu izdavanja i čuvanja vodnih akata. Konstatuje se da je podnosilac zahtjeva JKP „Komunalac“ d.o.o. Hadžići, ispunio minimum uslova za izdavanje vodne dozvole za zahvatanje vode sa izvorišta „Kradenik“ u svrhu obezbjeđenja potrebnih količina vode za piće stanovništva i privrede koje se vodom snabdijeva putem javnog vodovodnog sistema, na području naselja Pazarić, općina Hadžići, te je riješeno kao u dispozitivu ovog rješenja.

Podnosilac zahtjeva je uplatio upravnu taksu u iznosu od 70 KM u skladu sa Zakonom o federalnim upravnim taksama i tarifi federalnih upravnih taksi („Službene novine Federacije BiH“, broj 6/98, 8/00, 45/10 i 43/13).

Uputa o pravnom lijeku

Protiv ovog rješenja može se uložiti žalba Federalnom ministarstvu poljoprivrede, vodoprivrede i šumarstva, putem ove Agencije, u roku od 15 dana od dana prijema rješenja. Žalba se podnosi neposredno pismeno, usmeno na zapisnik ili preporučeno putem pošte ovom organu i taksira se sa 15 KM administrativne takse prema tarifnom broju 3. Tarife federalnih administrativnih taksi.

Voditelj postupka:

mr. sci. Selma Merdan, dipl.inž.geol.

Po ovlaštenju
Rukovodilac sektora za izdavanje vodnih akata


Nihad Pezo, dipl.inž.građ.

Dostaviti:

- JKP „Komunalac“ d.o.o.
Ul. Žunovačka 4, 71240 Hadžići,
- ⊖ AVP-ISV-Vodna knjiga,
- Sektor 50,
- Sektor 40, arhiva,
- oglasna ploča – AVP Sava